

Broj:
Mostar,

NACRT

Na osnovu člana 14. alineja 4., člana 29., člana 30. stav (2), člana 70. stav (2), člana 74. stav (2) i člana 78. stav (7) alineja 3. Zakona o električnoj energiji („Službene novine Federacije BiH“ broj 41/02, 24/05, 38/05 i 83/11), člana 12. stav (1) i člana 14. stav (1) Statuta Regulatorne komisije za električnu energiju u Federaciji Bosne i Hercegovine („Službene novine Federacije BiH“ broj 13/04), člana 31. stav (2), člana 37. stav (4) i člana 49. Poslovnika o radu Regulatorne komisije za električnu energiju u Federaciji Bosne i Hercegovine („Službene novine Federacije BiH“ broj 59/04), te člana 91. stav (2) Pravilnika o javnim raspravama i rješavanju zahtjeva i žalbi Regulatorne komisije za električnu energiju u Federaciji Bosne i Hercegovine („Službene novine Federacije BiH“ broj 37/05) i člana 43. i člana 48. stav (3) Pravilnika za izdavanje dozvola – licenci („Službene novine Federacije BiH“ broj 29/05), postupajući na vlastitu inicijativu, Regulatorna komisija za električnu energiju u Federaciji Bosne i Hercegovine – FERK je dana _____. godine na ____ redovnoj sjednici donijela sljedeće

R J E Š E N J E **o oduzimanju dozvole**

1. Preduzeću MEGAPLAN BH d.o.o. Mostar, Dubrovačka 69, Mostar, oduzima se Dozvola za rad - licenca za obavljanje elektroprivredne djelatnosti snabdijevanje električnom energijom drugog reda broj 06-03-871/8/10 od 19.10.2010. godine.
2. Ovo rješenje je konačno i stupa na snagu danom donošenja, te se objavljuje na oglasnoj tabli i web stranici FERK-a, a dispozitiv ovog rješenja u „Službenim novinama Federacije BiH“.
3. Stupanjem na snagu ovog rješenja prestaje važiti Rješenje broj 06-03-871-10/8/10 od 19.10.2010. godine, kojim je izdata Dozvola za rad - licenca za obavljanje elektroprivredne djelatnosti snabdijevanje električnom energijom drugog reda broj 06-03-871/8/10.

O b r a z l o ž e n j e

Članom 14. alineja 4. Zakona o električnoj energiji propisane su nadležnosti FERK-a, te pored ostalih i izdavanje ili oduzimanje dozvola za proizvodnju, distribuciju, snabdijevanje i trgovinu električne energije. Članom 30. stav (2) ovog zakona propisano je da je imalac dozvole dužan dostavljati podatke i informacije iz stav (1) istog člana u traženim rokovima, te sarađivati sa Regulatornom komisijom. Članom 70. stav (2) Zakona o električnoj energiji propisano je da je imalac dozvole iz ovog zakona dužan ispunjavati obaveze utvrđene dozvolom, dok je članom 74. stav (2) istog zakona propisano da se dozvolom utvrđuje rok u kojem je imalac dozvole za rad dužan započeti sa obavljanjem djelatnosti za koju je dozvola izdata, a članom 78. stav (7) alineja 3. zakona da se dozvola

drugog reda izdaje podnosiocu zahtjeva pod uslovom da prihvati obaveze radi pružanja informacija FERK-u i DERK-u.

Članom 43. Pravilnika za izdavanje dozvola – licenci propisano je da će FERK oduzeti dozvolu ukoliko: imalac dozvole ne poštuje uslove i rokove postavljene dozvolom; imalac dozvole odluči da ne obavlja odobrenu elektroprivrednu djelatnost o čemu je dužan prethodno obavijestiti FERK; imalac dozvole, tokom obavljanja licencirane djelatnosti, ne podnese tražene podatke i informacije FERK-u; imalac dozvole namjerno podnese netačne podatke i informacije FERK-u; imalac dozvole ne omogući FERK-u direktan pristup opremi i dokumentaciji; imalac dozvole prijeti finansijska nesolventnost, stečaj ili likvidacija; imalac dozvole ne plati regulatorne naknade. Istim članom je propisano i da se postupak za oduzimanje dozvole obavlja na isti način kao i postupak za izdavanje dozvole, kao i da postupku oduzimanja dozvole prethodi pisana opomena FERK-a, te da se nakon što FERK primi odgovor na opomenu od imalca dozvole, ili isti ne odgovori u roku koji odredi FERK, provodi postupak oduzimanja dozvole, a ukoliko tokom postupka, imalac dozvole ispuni propisane uslove za obavljanje djelatnosti, FERK može obustaviti postupak oduzimanja dozvole. Članom 48. stav (3) istog Pravilnika propisano je da će FERK u slučajevima težih povreda uslova iz dozvole, odredbi zakona i ovog pravilnika, pokrenuti aktivnosti vezane za oduzimanje dozvole.

FERK je vršenjem Zakonom o električnoj energiji propisanih nadležnosti ustanovio da imalac dozvole za rad – licence za obavljanje elektroprivredne djelatnosti snabdijevanje električnom energijom drugog reda broj 06-03-871/8/10 od 19.10.2010. godine, MEGAPLAN BH d.o.o. Mostar nije postupio u skladu sa uslovima izdate dozvole, na način da nije izvršio svoje obaveze dostavljanja procjene obima kupovine i prodaje električne energije (za kvalifikovane kupce sa godišnjom potrošnjom iznad 10 GWh do 1. jula tekuće godine za narednu godinu, a za sve ostale kupce do 30. septembra tekuće za narednu godinu), zatim pregled nabavljene i prodane električne energije po naponskim nivoima sa pojedinačnim popisima kvalifikovanih kupaca i njihovom potrošnjom električne energije u prethodnoj godini (do 31. januara svake godine), zatim planove preuzimanja i isporuke električne energije po naponskim nivoima i nazivima kupaca i snabdjevača, kao i izvještaj o realizaciji planova (na godišnjem nivou), te sve finansijske izvještaje i izvještaje o eventualnim zaključenim ugovorima o snabdijevanju električnom energijom drugog reda na teritoriji Bosne i Hercegovine (odmah po zaključenju istih), kao i obaveze mjesečnog izvještavanja (tabele 1.- 6.) iz Pravilnika o izvještavanju FERK-a za imalce dozvole za snabdijevanje električnom energijom drugog reda i nezavisne proizvođače.

FERK je uzeo u obzir i to da je iz Mjesečnog izvještaja o trgovini električnom energijom primljenim pod brojem 01-01-690/11, a koje je Nezavisni operator sistema u Bosni i Hercegovini – NOSBiH dostavio FERK-u dana 06.07.2011. godine, vidljivo da je imalac dozvole za rad – licence MEGAPLAN BH d.o.o. Mostar u periodu od 01.06.2011. godine do 30.06.2011. godine imao jednu kupovinu električne energije i jednu prodaju električne energije. Iz ostalih mjesečnih izvještaja o trgovini električnom energijom, koje NOSBiH redovno dostavlja FERK-u vidljivo je, ne uključujući naprijed navedenu kupovinu i prodaju električne energije, da imalac dozvole za rad – licence MEGAPLAN BH d.o.o. Mostar od izdavanja FERK-ove dozvole za rad – licence ne obavlja elektroprivrednu djelatnost za koju je dobio dozvolu. Iako je imalac dozvole za rad – licence MEGAPLAN BH d.o.o. Mostar dao određena pojašnjenja i obrazloženja u vezi svog obima poslovanja, koja se odnose na neuspjeh na konkursima, nakon dobijanja FERK-ove dozvole za rad –

licence, MEGAPLAN BH d.o.o. Mostar nije obavijestio FERK o eventualnim okolnostima zbog kojih imalac dozvole opravdano ne može obavljati djelatnosti navedene u dozvoli, kao ni o svim važnijim izmjenama u pravnom okviru, sudskim odlukama, događanjima ili ugovorima koji imaju uticaja na djelatnost snabdijevanje električnom energijom drugog reda.

Obzirom na navedeno, te obzirom na nedostavljanje svih naprijed navedenih podataka, FERK je utvrdio da imalac dozvole za rad – licence MEGAPLAN BH d.o.o. Mostar ne obavlja djelatnost za koju je dobio dozvolu za rad – licencu. Iako je imalac dozvole za rad – licence MEGAPLAN BH d.o.o. Mostar od dana izdavanja FERK-ove dozvole izvršio jednu kupovinu električne energije i jednu prodaju električne energije, isto je neznatnog značaja obzirom na trajanje perioda od kada isti posjeduje dozvolu za rad - licencu.

Osim naprijed navedenog, FERK je utvrdio da imalac dozvole za rad – licence MEGAPLAN BH d.o.o. Mostar nije platio regulatornu naknadu FERK-u u vezi sa članom 23. Zakona o električnoj energiji, počevši od dana izdavanja dozvole za rad – licence, odnosno od 19.10.2010. godine, a što je bio u obavezi u skladu sa članom 3. Odluke o privremenoj regulatornoj naknadi za period od 01.01.2011. do 30.06.2011. godine broj 01-07-1683-01/10 od 21.12.2010. godine („Službene novine Federacije BiH“ broj 87/10), te članom 3. Odluke o privremenoj regulatornoj naknadi u 2011. godini broj 01-07-735-01/11 od 20.07.2011. godine („Službene novine Federacije BiH“ broj 46/11).

FERK je 26.07.2011. godine primio prigovor od MEGAPLANA BH d.o.o. Mostar pod brojem 06-03-762/11, na Obavještenje o obavezi plaćanja br. 11-360-000078 od 21.07.2011. godine. U prigovoru je imalac dozvole za rad-licence naveo da nije u mogućnosti izvršiti svoje obaveze prema FERK-u obrazlažući svoje prihode i svoje obaveze prema drugima. FERK je dopisom broj 08-03-762-01/11 dana 23.08.2011. godine uputio svoj odgovor na prigovor broj 06-03-762/11 u kojem je navedeno, između ostalog, da u skladu sa Odlukom o privremenoj regulatornoj naknadi u 2011. godini broj 01-07-735-01/11 od 20.07.2011. godine: „Novi imaoci dozvola, koji su dozvole dobili u 2010. i 2011. godini ili će dobiti u definisanom periodu iz člana 1. ove odluke, a nisu obuhvaćeni članom 2., **dužni su po ovoj odluci izvršiti plaćanje regulatorne naknade od momenta dobijanja dozvole za rad**, zaključno sa usvajanjem Budžeta FERK-a za 2011. godinu od strane Parlamenta Federacije BiH i to u iznosu koji će im biti utvrđen izdatim obavještenjima o obavezi plaćanja, **a sve u skladu sa planiranim ukupnim prihodom za tekuću godinu imaoca dozvole.**” Takođe je navedeno da FERK kao instituciju interesuju obaveze imaoca dozvola za obavljanje elektroprivrednih djelatnosti, ali ne i poslovna politika vezana za planiranje prihoda, rashoda, postavljanje prioriteta prilikom izmirenja obaveza imaoca dozvola, niti održavanja likvidnosti kompanije. Nakon ovog odgovora od strane FERK-a, MEGAPLAN BH d.o.o. Mostar više se nije oglašavao niti obaveze izmirivao.

FERK je svojim Obavještenjem broj 11-360-000110 od 03.10.2011. godine pored definisanja obaveze MEGAPLANA BH d.o.o. Mostar za četvrti kvartal 2011. godine u iznosu od 7.162,02 KM uputio istom i Opomenu o njegovim obavezama po prethodnom Obavještenju broj 11-360-000078 od 21.07.2011. godine za I, II i III kvartal, odnosno od momenta izdavanja dozvole za rad (19.10.2010.) u iznosu od 27.136,05 KM, te istom precizirao rok za ispunjenje obaveza, po čemu imalac dozvole za rad - licence nije postupio.

Obzirom na navedeno, imalac dozvole za rad – licence MEGAPLAN BH d.o.o. Mostar je povrijedio tačku 4.1.1. kojom je propisano da je imalac dozvole dužan pridržavati se svih važećih zakona, podzakonskih akata, tehničkih propisa, pravilnika i standarda, te pravila i propisa FERK-a i DERK-a, kao i uslova ove dozvole, direktiva EU i međunarodnih ugovora koje je prihvatila BiH, a u vezi sa svojom obavezom mjesečnog izvještavanja u skladu sa Pravilnikom o izvještavanju FERK-a za imaoce dozvole za snabdijevanje električnom energijom drugog reda i nezavisne proizvođače tabele 1.- 6. („Službene novine Federacije BiH“ broj 15/11). Takođe, imalac dozvole za rad – licence MEGAPLAN BH d.o.o. Mostar je povrijedio i tačku 4.6.1., kojom je propisano da je imalac dozvole obavezan dostaviti FERK-u procjenu obima kupovine i prodaje električne energije za kvalifikovane kupce sa godišnjom potrošnjom iznad 10 GWh do 1. jula tekuće godine za narednu godinu, a za sve ostale kupce do 30. septembra tekuće za narednu godinu; tačku 4.7., kojom je propisano da je imalac dozvole dužan svake godine, 31. januara, dostavljati FERK-u pregled nabavljene i prodane električne energije po naponskim nivoima sa pojedinačnim popisima kvalifikovanih kupaca i njihovom potrošnjom električne energije u prethodnoj godini; tačku 4.12.1., kojom je propisano da je imalac dozvole dužan na godišnjem nivou dostavljati FERK-u planove preuzimanja i isporuke električne energije po naponskim nivoima i nazivima kupaca i snabdjevača, kao i izvještaj o realizaciji planova; tačku 4.12.2., kojom je propisano da je imalac dozvole dužan FERK-u dostaviti sve finansijske izvještaje i izvještaje o zaključenim ugovorima o snabdijevanju električnom energijom drugog reda na teritoriji Bosne i Hercegovine odmah po zaključenju istih; tačku 8.1., kojom je propisano da je imalac dozvole obavezan obavljati djelatnosti navedene u dozvoli, te da ukoliko tokom obavljanja djelatnosti nastupe okolnosti zbog kojih imalac dozvole opravdano ne može obavljati djelatnosti navedene u dozvoli, obavezan je o tome, bez odlaganja, obavijestiti FERK; tačku 8.2., kojom je propisano da imalac dozvole ne može bez prethodnog odobrenja FERK-a napustiti ili izmijeniti djelatnost snabdijevanje električnom energijom drugog reda; tačku 14.4., kojom je propisano da je imalac dozvole obavezan obavještavati FERK o svim važnijim izmjenama u pravnom okviru, sudskim odlukama, događanjima ili ugovorima koji imaju uticaja na djelatnost snabdijevanja električnom energijom drugog reda; tačku 16.1., kojom je propisano da je imalac dozvole obavezan plaćati regulatornu naknadu za obavljanje djelatnosti snabdijevanje električnom energijom drugog reda u iznosu koji utvrdi FERK posebnom odlukom; i tačku 16.2., kojom je propisano da se regulatorna naknada plaća tromjesečno.

Obzirom na navedeno, u skladu sa članom 48. Pravilnika za izdavanje dozvola - licenci FERK je istom 16.11.2011. godine uputio pod brojem 06-03-1153/11 Opomenu, kojom je imaoocu dozvole za rad - licence MEGAPLAN BH d.o.o. Mostar ostavljen rok do 24.11.2011. godine za dostavljanje:

- procjene obima kupovine i prodaje električne energije za kvalifikovane kupce sa godišnjom potrošnjom iznad 10 GWh i za sve ostale kupce,
- pregleda nabavljene i prodane električne energije po naponskim nivoima sa pojedinačnim popisima kvalifikovanih kupaca i njihovom potrošnjom električne energije u prethodnoj godini,
- planova preuzimanja i isporuke električne energije po naponskim nivoima i nazivima kupaca i snabdjevača, kao i izvještaja o realizaciji planova (na godišnjem nivou),

- svih finansijskih izvještaja i izvještaja o eventualnim zaključenim ugovorima o snabdijevanju električnom energijom drugog reda na teritoriji Bosne i Hercegovine, ukoliko su isti zaključeni,
- informacija o eventualnim okolnostima zbog kojih imalac dozvole opravdano ne može obavljati djelatnosti navedene u dozvoli, ukoliko su iste nastupile,
- informacija o svim važnijim izmjenama u pravnom okviru, sudskim odlukama, događanjima ili ugovorima koji imaju uticaja na djelatnost snabdijevanje električnom energijom drugog reda, ukoliko je istih bilo,
- mjesečnih izvještaja iz tabele 1.- 6. Pravilnika o izvještavanju FERK-a za imaoce licence za snabdijevanje električnom energijom drugog reda i nezavisne proizvođače,
- detaljnog obrazloženja razloga neplaćanja regulatorne naknade FERK-u.

Osim navedenog opomenom je imaoocu dozvole ostavljen rok od osam dana od dana prijema navedene opomene za plaćanje regulatorne naknade za 2011. godinu po dostavljenim obavještenjima i to u ukupnom iznosu od 34.298,07 KM.

Opomenom je imalac dozvole za rad-licence MEGAPLAN BH d.o.o. Mostar jasno upućen da će FERK, u slučaju da isti ne otkloni gore navedene nedostatke u datom roku i pored dostavljenog obrazloženja, pokrenuti postupak oduzimanja predmetne dozvole za rad-licence, na način propisan članom 43. stav (2) Pravilnika za izdavanje dozvola-licenci.

Imalac dozvole za rad-licence MEGAPLAN BH d.o.o. Mostar nije postupio po navedenoj opomeni, niti je u FERK dostavio bilo kakvo obrazloženje vezano za navode iz iste.

Obzirom na sve navedeno, uzimajući u obzir činjenicu da imalac dozvole za rad-licence MEGAPLAN BH d.o.o. Mostar nije izvršio obaveze iz Dozvole za rad - licence za obavljanje elektroprivredne djelatnosti snabdijevanje električnom energijom drugog reda broj 06-03-871/8/10 od 19.10.2010. godine stekli su se uslovi za pokretanje postupka oduzimanja predmetne dozvole za rad - licence i objavu obavještenja za javnost o pokretanju postupka oduzimanja dozvole za rad - licence. U tom smislu, FERK je 22.12.2011. godine pod brojem 06-03-871-11/8/10 donio na svoju inicijativu Odluku o pokretanju postupka oduzimanja Dozvole za rad – licence za obavljanje elektroprivredne djelatnosti snabdijevanje električnom energijom drugog reda broj 06-03-871/8/10, koju je FERK izdao 19.10.2010. godine MEGAPLANU BH d.o.o. Mostar.

Postupajući u skladu sa članom 49. Poslovnika o radu FERK-a i članom 43. stav (2) Pravilnika za izdavanje dozvola – licenci, FERK je dana 23.12.2011. godine u „Dnevnom listu“ i „Oslobođenju“, kao i na svojoj web stranici objavio Obavještenje za javnost o pokrenutom postupku oduzimanja Dozvole za rad - licence za obavljanje elektroprivredne djelatnosti snabdijevanja električnom energijom drugog reda broj 06-03-871/8/10, koju je FERK izdao 19.10.2010. godine MEGAPLANU BH d.o.o. Mostar. Povodom Obavještenju za javnost, FERK do roka naznačenog u obavještenju odnosno do 10.01.2012. godine do 12:00 sati, nije primio pisane komentare zainteresovanih lica na pokrenuti postupak oduzimanja dozvole, niti su podneseni zahtjevi za sticanje statusa umješaka.

FERK je po konačnom usvajanju Budžeta FERK-a za 2011. godinu od strane Parlamenta Federacije BiH (11.01.2012. godine) donio Odluku o utvrđivanju regulatornih naknada za 2011. godinu broj 08-07-47-01/12 od 13.01.2012. godine, na osnovu koje je uradio usklađivanje izdatih obavještenja, primjenjujući odredbu člana 5. stav (2) Odluke o privremenoj regulatornoj naknadi u 2011. godini („Službene novine Federacije BiH“ broj

46/11), te izdao imaocu dozvole za rad - licence MEGAPLAN BH d.o.o. Mostar Obavještenje broj 11-360-000138 datirano sa 31.12.2011. godine, jer se obaveze odnose na poslovnu 2011. godinu, kao i Budžet 2011. godine. Navedenim obavještenjem obaveza MEGAPLANA BH d.o.o. Mostar za 2011. godinu je umanjena za 611,03 KM, dok se dio obaveze (5.089,20) koji se odnosi na period posjedovanja dozvole u 2010. godini, a koji je sadržan u iznosu Obavještenja broj 11-360-000078 od 21.07.2011. godine, nije trebao, niti se usklađivao. Iz svega navedenog definisana je konačna ukupna obaveza na ime regulatorne naknade MEGAPLANA BH d.o.o. Mostar od **33.687,04 KM**. Imalac dozvole za rad - licence ni po jednom navedenom obavještenju nije postupio :

1. Obavještenje o obavezi plaćanja broj 11-360-000078 od 21.07.2011. godine **27.136,05 KM**
2. Obavještenje o obavezi plaćanja broj 11-360-000110 od 03.10.2011. godine **7.162,02 KM**
3. Obavještenje o obavezi plaćanja broj 11-360-000138 od 31.12.2011. godine **-611,03 KM.**

Na osnovu provedenog postupka, tokom kojeg je izvršena pažljiva analiza svih činjenica i podnesenih dokaza na osnovu kojih se moglo utvrditi stanje stvari, FERK je u skladu sa članom 43. stav (2) Pravilnika za izdavanje dozvola - licenci pripremio Nacrt rješenja o oduzimanju dozvole za obavljanje elektroprivredne djelatnosti snabdijevanje električnom energijom drugog reda u postupku oduzimanja Dozvole za rad - licence broj 06-03-871/8/10, koju je FERK izdao 19.10.2010. godine MEGAPLANU BH d.o.o. Mostar, a isti je usvojio Odlukom broj 06-03-871-12/8/10 od 13.01.2012. godine. Odlukom FERK-a broj 06-03-871-13/8/10 od 13.01.2012. godine ovaj nacrt je upućen u proces javne rasprave, te je određeno mjesto i vrijeme održavanja opšte rasprave o predmetnom nacrtu rješenja, imenovan voditelj postupka, kao i da zainteresovana lica svoje usmene komentare na nacrt rješenja mogu dati na opštoj raspravi koja je održana _____ godine u ____ sati, u prostorijama _____, a pisane komentare dostaviti na adresu FERK-a i na elektronsku adresu do 31.01.2012. godine do 12:00 sati.

Na opštoj raspravi o Nacrtu rješenja o oduzimanju dozvole za obavljanje elektroprivredne djelatnosti snabdijevanje električnom energijom drugog reda u postupku oduzimanja Dozvole za rad - licence broj 06-03-871/8/10, koju je FERK izdao 19.10.2010. godine MEGAPLANU BH d.o.o. Mostar bili su prisutni _____. Imalac dozvole za rad - licence MEGAPLAN BH d.o.o. Mostar istakao je_____.

Do ostavljenog roka za dostavu pisanih komentara, odnosno do 31.01.2012. godine do 12:00 sati, u FERK nisu primljeni pisani komentari na Nacrt rješenja o oduzimanju dozvole za rad - licence za obavljanje elektroprivredne djelatnosti snabdijevanje električnom energijom drugog reda u postupku oduzimanja Dozvole za rad - licence broj 06-03-871/8/10, koju je FERK izdao 19.10.2010. godine MEGAPLANU BH d.o.o. Mostar.

U skladu sa članom 16. Pravilnika o javnim raspravama i rješavanju zahtjeva i žalbi FERK-a, a na osnovu održane opšte rasprave, voditelj postupka je pripremio pisani izvještaj uz sažetak komentara na raspravi i dao preporuku za donošenje odluke, te je isti dostavljen na razmatranje FERK-u dana _____. godine pod internim brojem _____, a prije njegovog konačnog odlučivanja na redovnoj sjednici.

Kod donošenja ovog rješenja, pored povrede uslova dozvole i to tačaka 4.1.1., 4.6.1., 4.7., 4.12.1., 4.12.2., 8.1., 8.2., 14.4., 16.1. i 16.2., na osnovu kojih su se stekli uslovi za pokretanje postupka oduzimanja dozvole, FERK je posebno uzeo u obzir odredbe člana

73. Zakona o električnoj energiji kojim je jasno propisano pod kojim uslovima se može izdati dozvola za rad, uključujući i ispunjavanje drugih uslova utvrđenih posebnim aktom Regulatorne komisije, kao i da uslovi koje FERK postavlja u izdatim dozvolama za rad - licencama za cilj imaju zadovoljenje opštih i posebnih kriterija propisanih Zakonom o električnoj energiji i bliže određenih Pravilnikom za izdavanje dozvola - licenci, a čije postavljanje je rezultat opsežno provedenog postupka javnih rasprava. Uslovi svake dozvole za rad - licence koju izdaje FERK obuhvataju: Opšte odredbe; Definicije; Obavljanje licencirane djelatnosti; Obaveze imaoca dozvole; Računovodstvene aktivnosti; Finansijski integritet i stabilnost imaoca dozvole; Kvalifikacijsku strukturu zaposlenika imaoca dozvole; Napuštanje ili izmjena djelatnosti; Nadgledanje; Izmjena, dopuna, obnova, prenos i oduzimanje dozvole; Sankcije; Rješavanje sporova; Ugovori; Komunikacija; Tajnost podataka i Regulatorna naknada.

Tako je FERK i prilikom izdavanje Dozvole za rad - licence za obavljanje elektroprivredne djelatnosti snabdijevanje električnom energijom drugog reda broj 06-03-871/8/10 od 19.10.2010. godine postavio određene uslove imaocu dozvole za rad – licence MEGAPLANU BH d.o.o. Mostar.

Međutim suprotno postavljenim uslovima izdate dozvole imalac dozvole za rad – licence MEGAPLAN BH d.o.o. Mostar nije obavljao elektroprivrednu djelatnost za koju mu je izdata dozvola za rad – licenca, nije vršio obavezu izvještavanja FERK-a u vezi sa obavljanjem djelatnosti snabdijevanje električnom energijom drugog reda i nije plaćao regulatornu naknadu. Kako imalac dozvole za rad – licence MEGAPLAN BH d.o.o. Mostar nije, u skladu sa računovodstvenom evidencijom FERK-a, izvršio obavezu plaćanja regulatorne naknade za 2010. godinu (period 19.10.2010. godine do 31.12.2010. godine), te za I, II, III i IV kvartal 2011. godine, time je postupio i suprotno Odluci o privremenoj regulatornoj naknadi za period od 01.01.2011. do 30.06.2011. godine broj 01-07-1683-01/10 od 21.12.2010. godine, te suprotno Odluci o privremenoj regulatornoj naknadi u 2011. godini broj 01-07-735-01/11 od 20.07.2011. godine, pa slijedeći navedeno ni u skladu sa Odlukom o utvrđivanju regulatorne naknade za 2011. godinu broj 08-07-47-01/12 od 13.01.2012. godine, a u vezi sa tačkom 16. gore navedene dozvole za rad - licence.

Budući da tokom perioda od izdavanje Dozvole za rad – licence za obavljanje elektroprivredne djelatnosti snabdijevanje električnom energijom drugog reda broj 06-03-871/8/10, odnosno od 19.10.2010. godine, pa do 31.12.2011. godine, MEGAPLAN BH d.o.o. Mostar nije plaćao regulatornu naknadu, a koji period odgovara periodu od nepunih pet kvartala (obračun rađen na bazi dana), MEGAPLAN BH d.o.o. Mostar je obavezan platiti regulatornu naknadu za posjedovanje i korištenje dozvole u iznosu od 33.687,04 KM.

Na osnovu provedenog postupka oduzimanja Dozvole za rad - licence broj 06-03-871/8/10, koju je FERK izdao 19.10.2010. godine MEGAPLANU BH d.o.o. Mostar, analize postupka opšte rasprave, komentara javnosti datih u postupku opšte rasprave, odnosno izvještaja voditelja postupka utvrđeno je da MEGAPLAN BH d.o.o. Mostar nije otklonio naprijed navedene nedostatke, te je FERK u skladu sa članom 14. alineja 4., članom 74. stav (2) i članom 78. stav (7) alineja 3. Zakona o električnoj energiji, a u vezi sa članom 43. Pravilnika za izdavanje dozvola – licenci, odlučio kao u dispozitivu rješenja.

POUKA O PRAVNOM LIJEKU:

Protiv ovog rješenja MEGAPLAN BH d.o.o. Mostar može tužbom pokrenuti upravni spor kod Kantonalnog/Županijskog suda u Mostaru u roku od 30 dana od dana prijema rješenja.

Tužba se predaje sudu direktno ili mu se šalje poštom preporučeno. Tužba se može izjaviti i na zapisnik kod navedenog suda ili bilo kojeg drugog suda.

PREDSJEDNICA FERK-a
Đulizara Hadžimustafić